


Ni Pangulong
Thomas S. Monson



Magtindog bilang Kasanag

Nangin pribelihiyo ko ang magtambong sa madamo nga pangkultura nga mga celebrasyon nga ginalhiwat angot sa mga pagpahanungod sang templo. Nanamian ako sa ila tanan, lakip na ang pinakauihi nga akon gintambongan sa Phoenix, Arizona, USA, sang nagligad nga Nobyembre.

Ang lamharon nga mga miyembro sang Simbahan nga nagapasakop sa pangkultura nga mga celebrasyon nagpakaít sang manami, halandumon nga mga programa. Sang nagligad nga tuig sa Phoenix, antes lang gid sang celebrasyon, ginhambalan ko ang mga tag-pasakop, "Mga anak kamo sang kasanag."

Luyag ko nga mahibaloan sang tanan nga mga lamharon sang Simbahan nga mga anak sila sang kasanag. Bangud sina, may responsibilidad sila nga "mangin mga sulu sa kalibutan" (Mga Taga-Filipos 2:15). May katungdanan sila nga ipaambit ang mga kamatuoran sang ebanghelyo. May obligasyon sila nga magtindog bilang parola sang templo, nga nagapasilak sang kasanag sang ebanghelyo sa labing nagadulom nga kalibutan. May mando sila nga tipigan ang ila sulu nga nagasiga kag nagasilak sing masanag.

Agud kita "manginhuwaran sa mga nagatuo" (1 Timoteo 4:12), kita mismo dapat magtuo. Dapat kita magpatubo sang pagtuo nga kinahanglanon agud makapadayon sing espirituhanon kag magpasilak sang kasanag sa iban. Dapat naton atipanon ang aton panaksihon tubtob nga mangin angkla ini para sa aton mga kabuhi.

Kalakip sa pinakapektibo nga mga pamaagi agud maangkon kag matipigan ang pagtuo nga ginakinahanglan naton sa karon amo ang pagbasa kag pagtuon sang balaan nga mga kasulatan kag pagpangamuyo sing masunson kag tayuyon. Sa mga lamharon sang Simbahan, nagasiling ako, kon wala pa ninyo ini ginahimo, magpatubo karon sang pamatasan sang adlaw-adlaw nga pagtuon sang balaan nga mga kasulatan kag pagpangamuyo. Kon wala ining duha ka importante nga mga buluhaton, ang mga impluwensya sang kalibutan kag ang kon-kaisa mapait nga realidad sang pangabuhi makapapiraw ukon bisan pa makapalong sang inyo kasanag.

Ang mga tinuig sang pagkalamharon indi mahapos. Amo ini ang ali nga mga tinuig nga si Satanas magaten tar sa inyo kag magahimo sang iya bug-os nga ikasarang agud patalangon kamo palayo sa alagyan nga magadala sa inyo pabalik sa inyo langitnon nga puluy-an. Pero sa inyo pagbasa kag pagpangamuyo kag pag-alagad kag pagtuman, makilala ninyo sing mas tul-id "ang kasanag nga nagasilak sa kadulom" (D&C 6:21), ang aton Ehemplo kag aton kabakod—bisan pa ang Ginuong Jesucristo. Sia ang Kasanag nga aton ipataas agud magpuas ang nagalikop nga kadulom (tan-awa sa 3 Nefi 18:24)

Nga may mabakod nga panaksihon sang Manluluwas kag sa Iya ginpanumbalik nga ebanghelyo, wala katapusan ang inyo oportunidad nga magsilak. Ginapalibutan kamo sang mga ini adlaw-adlaw, sa bisan ano nga sirkumstansya

ninyo. Sa pagsunod ninyo sa ehemplong sang Manluluwas, maangkon ninyo ang oportunidad nga mangin kasanag, nga amo kamo sini, sa mga kabuhin sang nagapalibot sa inyo—sa miyembro sang inyo kaugalingon nga pamilya, mga kaklase, mga kaupod sa ulubrahan, mga kakilala, ukon lubos nga mga estranghero.

Kon kamo kasanag sa kalibutan, ang mga tawo sa palibot ninyo magabatyag sang pinasahi nga espiritu nga magaganyat sa ila nga mag-upod sa inyo kag magsunod sang inyo ehemplong.

Nagapangabay ako sa mga ginikanan kag mga lider sang aton mga lamharon nga buligan sila sa pagtindog para sa kamatuoran kag pagkamatarong. Buligi nga maabrihan sing masangkad ang ila panan-aw sang mga ganhaan sang pagtuon, sang paghangop, kag sang pag-alagad sa ginharian sang Dios. Patubua sa ila ang kabakod nga batuan ang mga tentasyon sang kalibutan. Hatagi sila sang determinasyon nga magpangabuhin sing matarong kag may pagtuon, nga mangin mapinangamuyon, kag magsandig sa langit bilang ila malig-on nga angkla.

Sa aton mga lamharon, nagasiling ako, ang aton Amay nga Langitnon nagapalangga sa inyo. Kabay nga mabat-yagan man ninyo ang pagpalangga sang mga lider sang Simbahan para sa inyo. Kabay nga padayon kamo nga makaangkon sang kaluyag nga mag-alagad sa inyo Amay nga Langitnon kag sa Iya Anak. Kag kabay nga sa tanan nga tinion magpanglakaton kamo sa kamatuoran kag magtin-dog bilang kasanag sa mga anak sang Dios.

PAGTUDLO GIKAN SA SINING MENSAHE

Huna-hunaa nga hambalan upod sa inyo ginatud-loan kon ano ang kahulungan nga mangin “[anak] sang kasanag.” Ano nga mga responsibilidad ang nagaupod diri? Sarang ninyo hambalan ang mga tinion sang ang ila kasanag nangin pinasahi ang kasidlak kag kon ano ang nagpasidlak diri. Huna-hunaa ang pagpangabay sa ila nga magpanumdom sang isa ka pat-od nga tawo, subong sang isa ka lamharon, isa ka kaupod sa trabaho, ukon isa ka miyembro sang ila pamilya, nga ayhan nagakinahanglan sang kasanag. Dayon sarang kamo magpangamuyo sing ulupod parte sa isa ka paagi nga mapaambit ang kasanag sa sina nga tawo.

LAMHARON

Parola sang Kasanag

Si Pangulong Thomas S. Monson nagapanudlo nga Sang mga lamharon sang Simbahan “may obligasyon nga magtindog bilang parola sang templo, nga nagapasilak sang kasanag sa labing nagadulom nga kalibutan.” Nagahatag sia sang pila ka mga pamaagi nga mahimo ini:

Magpaambit sang Ebanghelyo
Magpati
Magpatubo sang pagtuo
Mangin Iwag sa Iban
Atipanon ang inyo panaksihon tubtob nga mangin angkla ini sa inyo kabuhi
Magbasa kag magtuon sang balaan nga mga kasulatan
Magpangamuyo sing masunson kag dalayon
Mag-alagad
Magtuman

Hunahunaa ang paggrado sa inyo kaugalingon sumugod 1 tubtob 5 sa tagsa sinning mga aspeto. Sa mga bahin nga may manubo nga grado, sarang ninyo tun-an ining mga topiko sa balaan nga mga kasulatan ukon pangitaon ini sa LDS.org. Pagkatapos ninyo matun-an ining mga topiko, sarang kamo magpanumdom sang mga pamaagi nga mapabakod ninyo ining mga aspeto kag magpahamtang sang mga lalab-uton agud matuman ini.

MGA KABATAAN

Pagpaambit sang Inyo Kasanag

Bilang isa ka anak sang Dios, anak ka sang kasanag. Sarang ka mag-angkon sang dugang nga kasanag paagi sa pagsunod sa aton Manluluwas, nga si Jesucristo. Si Jesucristo kag ang Amay nga Langitnon nagapalangga sa imo kag luyag nga mag-iwag ka sa iban kag tuytuyan sila pakadto kay Cristo. Mahimo ka mag-iwag bisan lang sa pagkamatuod sa imo kaugalingon kon magsunod ka sa mga kasuguan, pareho sang pagpangamuyo kag pagbasa sang balaan nga mga kasulatan. Magdrowing sang pila ka mga bituon sa isa ka panid sang papel kag sulatan ang mga ini sang mga ideya kon paano ka makaiwag sa iban bilang ehemplong ni Jesucristo (halimbawa, “pagsimba,” ukon “pagbulig sa akon pamilya”).



Langitnon nga mga Kinaiya ni Jesucristo: Mapailubon kag Mapainubuson

Tun-i sing mainampuon ining materyal kag magpangamuyo agud mahibaloan kon ano ang ipaambit. Paano ang paghangop sa kabuhi kag misyon sang Manluluwas makapadugang sang inyo pagtuo sa Iya kag magabugay sa ila nga inyo ginabantayan paagi sa visiting teaching? Para sa dugang nga informasyon, maglog-on sa reliefsony.lds.org.

Kabahin ini sang sunod-sunod nga mga Mensahe sa Visiting Teaching nga nagapakita sang mga kinaiya sang Manluluwas.

Si Jesus nagsiling, “Ang labing daku sa tunga ninyo mangin subong sang kamanghuran, kag ang pangulo, mangin subong sang naga-alagad. Kay sin-o bala ang daku pa, ang nagalingkod sa pagkaon, ukon ang nagaalagad? Indi bala ang naga-lingkod sa pagkaon? Apang ako yari sa tunga ninyo subong sang naga-alagad” (Lucas 22: 26–27).

“Ang Manluluwas amo ang aton halimbawa sang gahum sang pagkamapainubuson kag pagkamapailubon. Kay sa katapusan, ang Iya pagpaidalum sa pagbuot sang Amay nagdala sang pinakadaku, kag bisan pa sang pinakamakagahum, nga hitabo sa bug-os nga kasaysayan. Ayhan, ang pila sang pinakabalaan nga mga pulong sa bug-os nga balaan nga mga kasulatan amo lang gid ang, ‘Indi ang akon kabubut-on, kundi ang imo, paghimoon’ (Lucas 22:42)”¹

Bilang mga disipulo ni Jesucristo, pirme kita nagatinguhang mangin pareho sa Iya. “Ang pagkamapailubon tuman kaimportante agud kita mangin mas Cristohanon,” siling ni Elder Ulisses Soares sang Seventy. Kon wala ini, indi kita makapatubo sang iban pa nga importante nga mga kinaiya. Ang mangin mapailubon wala nagakahulungan sang

kahuyang, kundi nagakahulungan ini sang paggawi nga may kaayo kag pagkamaluluy-on, nga nagapakita sang kabakod, katawhay, husto nga paghatag-bili sa kaugalingon, kag pagpugong-sa-kaugalingon.”² Sa aton pagtinguha nga mapatubo ining kinaiya, masalapuan naton nga “ang mapainubuson nga pagpaidalum sang aton pagbuot sa Amay nagadala sa aton sang pagpakamaayo sang Dios—ang gahum sang pagkamapainubuson. Ini amo ang gahum sa pag-atubang sang mga pagtilaw sang kabuhi, ang gahum sang paghidaet, ang gahum sang paglaum, ang gahum sang tagipusuon nga nagatibok nga may pagpalangga kag panaksihon para kay Jesucristo, bisan pa sa gahum sang pagtubos.”³

Dugang nga Balaan nga mga Kasulatan

Mateo 26:39; Juan 5:30; Mosias 3:19; Helaman 3:35

Gikan sa Balaan nga mga Kasulatan

Isa sang pinakamanami kag pinakagamhanan nga tinion sang pag-alagad ni Cristo amo sang gin hugasan Niya ang mga til sang Iya mga disipulo. “Natindog sa panihapon, ginalhal-id ang iya mga kunup, kag nagkuha sia sing inugpamahid kag ginwagkus niya. Nian nagbobo

sia sang tubig sa batiya, kag nagsugud sa paghinaw sang mga til sang mga gintoton-an, kag sa pagpahid sa ila sang inugpamahid nga nawagkus niya.” (Juan 13:4–5)

Sa pagpresentar sang Manluluwas sini nga ordinansa, ayhan ang mga disipulo nahalawhaw nga ang ila Ginuo kag Manunudlo nagluhod sa ila atubangan kag naghimo sang subong ka mapailubon nga pagalagad. Si Jesus dayon nagpaathag sang mga leksyon nga luyag Niya nga ila kag aton matun-an:

“Niyan kon ako, ang Ginuo kag Manunudlo ninyo, naghinaw sang inyo mga til, kamo man dapat mahinaway sang inyo mga til.

“Kay naghatag ako sa inyo sing sulundan, agud nga kamo man maghimo suno sa nahimo ko sa inyo” (Juan 13:14–15).

MGA TANDA

- Richard C. Edgley, “The Empowerment of Humility,” *Liahona*, Nob. 2003, 99.
- Ulisses Soares, “Be Meek and Lowly of Heart,” *Liahona*, Nob. 2013, 9.
- Richard C. Edgley, “The Empowerment of Humility,” 99.

Binagbinaga Ini

Paano ang pagkamapainubuson makabulig sa aton nga magpalangga subong sang ginhimo sang Manluluwas?